

- रक्षा मंत्री राजनाथ सिंह कह्यो—आतंकवाद रे खिलाफ जीरो टॉलरेन्स नीति—पहलगाम मांय हमलो करण वाळां ने नी बख्शा जावेला।
- पहलगाम आतंकी हमला री पूरी दुनिया मांय करड़ी निन्दा—प्रदेश मांय ई लोग विरोध प्रदर्शन कर र गुस्सो जतायो।
- हरियाळो राजस्थान अभियान रा तहत प्रदेश मांय चालू माली साल मांय दस करोड़ पौधा रोपणो तैय करी ज्यो।
- राज्य मांय काल ऊं पारो ओजू चढ़बा रा आसार—जैसलमेर, बाड़मेर अर झुन्झुनू मांय घणो उन्नो बायरो बाजण सारू चेताई ज्यो।

000

जम्मू-कश्मीर रा पहलगाम मांय काल व्ह्या आतंकी हमला ऊं उपज्या हालात रो जायजो लेवण सारू प्रधानमंत्री नरेन्द्र मोदी री सदरत मांय आला दर्जा री मीटिंग व्हे रही है। प्रधानमंत्री रा रहवास माथे चाल रही ई मीटिंग मांय गृहमंत्री अमित शाह, रक्षामंत्री राजनाथ सिंह अर विदेश मंत्री एस. जयशंकर ई शामिल है। मीटिंग मांय आतंकी हमला री जवाबी रणनीति रा बारा मांय चर्चा करी जा रही है। ध्यानजोग है के ई हमला मांय 2 स्थानीय लोगां समेत 26 सैलाणियां री मौत व्हे गयी ही। पुलिस अर खुफिया एजेन्सियां री ओर ऊं हमलो करण रा आरोपित तीन जणां रा स्कैच जारी करी ज्यो है। ई आतंकी हमला मांय मरण वाळा रा पिरवार वाळां ने जम्मू-कश्मीर सरकार री ओर ऊं 10-10 लाख रूपया री मदद रो ऐलाण करी ज्यो है। रक्षामंत्री राजनाथ सिंह फौज रा तीन्यू अंगां रा आला अहलकारां सागे कश्मीर घाटी मांय हालात रो जायजो लीनो। वे कह्यो के वारदात रा जिम्मेदार हमलावरां ने नी बख्शा जावेला। रक्षा मंत्री कह्यो भारत एक मोटो देश है जिण ने किण ई कीमत परां डरायो नी जा सके है।

-----

गृहमंत्री अमित शाह इण ऊं पैली जम्मू कश्मीर मांय पहलगाम रा बेसरन हलका मांय वारदात री ठौड़ रो दौरा कीनो। श्री शाह अनन्तनाग रा अस्पताल मांय भर्ती जख्मी लोगां सागे ई मुलाकात कर र वां रो हाल-चाल पूछयो। राष्ट्रपति द्रौपदी मुर्मू, उपराष्ट्रपति जगदीप धनखड़ अर प्रधानमंत्री नरेंद्र मोदी समेत केई सियासी पार्टियां रा नेता ई आतंकी हमला री करड़ी निंदा कीनी है। पूरी दुनिया अर देश मांय ई बर्बर आतंकी कार्यवाही री करड़ी निन्दा करी जा रही है। प्रदेश मांय ई न्यारी-न्यारी ठौड़ां पहलगाम आतंकी हमला रे खिलाफ प्रदर्शन करी ज्यो।

-----

पहलगाम आतंकी हमला रे पाछे उपजा हालात ने ध्यान राखता थकां आज श्रीनगर ऊं दिल्ली अर मुंबई सारू चार खास उड़ानां री व्यवस्था करी ज्यो है। जरूरत पड्यां सैलाणियां सारू और उड़ानां तैयार राख्यो ज्यो है। नागरिक उड्डयन मंत्री राम मोहन नायडू ई सगळी हवाई कंपनियां ने भाड़ो नी बधावण रा हुकम दीना है, ताकि मौजूदा मुश्किल बगत मांय किण ई मुसाफिर माथे बोझ नी पड़े। आतंकी वारदात ने ध्यान राखता थकां उत्तर रेलवे ई वैष्णो देवी-कटरा ऊं नई दिल्ली सारू आज रात खास रेलगाडी चलावण रो ऐलाण कीनो है।

000

अमेरिका रा उपराष्ट्रपति जे.डी. वैंस आज जयपुर ऊं आगरा पूग्या। उत्तरप्रदेश रा मुख्यमंत्री योगी आदित्यनाथ वां री अगवानी कीनी। श्री वैंस पिरवार समेत ताजमहल ने निरख्या। ई पाछे वे ओजू जयपुर पधार्या। श्री वैंस रो काल संवारे जयपुर ऊं अमेरिका जावण रो कार्यक्रम है।

000

भीलवाड़ा मांय आज 51 दिव्यांगजन ने विधायक अशोक कोठारी स्कूटी दीनी। कार्यक्रम मांय श्री कोठारी दिव्यांगजन ने कौशल विकास रे मार्फत खुद रे पाण ऊबा व्हेवण बाबत् कह्यो। विधायक कोठारी कह्यो के दिव्यांगजन मजबूत व्हे र हर हलका मांय आगे बध रह्या है।

000

आखा तीज अर पीपल पूण्यू रे मौके प्रदेश मांय बाळक जोड़ां रा ब्याह री शंकां ने ध्यान राखता थकां करड़ी निगराणी राख्यी जा रही है अर भांत-भांत रा जागरूकता कार्यक्रम व्हे रहा है। आं रे मार्फत बाल-विवाह निरोध कानून री जाणकारी दी जा रही है। जिला मांय बाल-विवाह रोकथाम सारू कन्ट्रोल रूम बनाया जा रह्या है।

चित्तौड़गढ़ रा जिला कलेक्टर आलोक रंजन बाल विवाह मुक्त भारत अभियान ने सफल बणावण सारू आज पोस्टर रो विमोचन कीनो। झालावाड़ मांय केन्द्रीय संचार ब्यूरो कोटा री ओर ऊं जागरूकता कार्यक्रम राख्यी ज्यो। उपमुख्यमंत्री दीया कुमारी रो काल जयपुर मांय बाल-विवाह मुक्त राजस्थान अभियान री सरूआत करण रो कार्यक्रम है। ई मौके बाल अधिकारिता विभाग री ओर ऊं राज्य स्तर री कार्यशाला ई राख्यी ज्यी है।

000

हरियाळो राजस्थान अभियान रा तैत प्रदेश मांय चालू माली साल मांय दस करोड़ पौधा रोपणो तैय करी ज्यो है। वन, पर्यावरण अर जलवायु विभाग री अतिरिक्त मुख्य सचिव अपर्णा अरोड़ा पौधा रोपण रा काम री तैयारियां रो आज जयपुर मांय राख्यी ज्यी मीटिंग मांय जायजो लीनो। श्रीमती अरोड़ा कह्यो के रोपी ज्या हर पौधा री हरियाळो राजस्थान मोबाइल एप्लीकेशन रे जरिये जिओ टैगिंग करी जावेला। वे कह्यो के ई अभियान ने नवाचार अर तकनीक रे जरिये जनता रो आन्दोलन बनायो जावेला। अरोड़ा कह्यो के औद्योगिक हलकां रे आरे-सारे, स्कूलां, अस्पतालां अर नगरीय हलकां मांय पौधा रोपण माथे खास ध्यान दियो जावेला।

000

8 ऊं 22 अप्रैल ताई मनायी ज्या राष्ट्रीय पोषण पखवाड़ा रा तैत करी ज्या काम मांय राजस्थान देश मांय अक्वल रह्यो है। महिला अर बाल विकास विभाग रा शासन सचिव महेन्द्र सोनी बतायो के पोषण पखवाड़ा रा तैत हाल ताई राज्य रा 15 जिला लक्ष्य ऊं आगे है।

टोंक जिला मांय पीपलू उपखण्ड रा आंगनबाड़ी केन्द्रां मांय करी ज्या गुणात्मक सुधारां री राष्ट्रीय स्तर माथे सराहवणा करी ज्यी है। टोंक री जिला कलेक्टर सौम्या झा बतायो के आंगनबाड़ी केन्द्रां मांय 100 फीसदी दक्षता सुधार री उपलब्धि हासिल करण मांय करीब 2 साल लाग्या।

-----

राज्य मांय काल ऊं पारो ओजू चढ़बा रा आसार है। ई कारण केई ठौड़ां लू बाजण री संभावना है। मौसम केन्द्र जयपुर काल जैसलमेर, बाड़मेर अर झुन्झुनू जिलां मांय हीटवेव रो अलर्ट जारी कीनो है। 25 अप्रैल ने सीकर समेत 7 जिलां मांय लू बाजण सारू चेतायी ज्यो है, जद के 26 अप्रैल ऊं 19 जिलां मांय लू री शंका है। ई बीचे लारला चौबीस घंटा रे दौरान 16 जिलां मांय दिन री बगत तापमान 40 डिग्री सेल्सियस ऊं ऊंचो नापी ज्यो। कोटा मांय पारो 42 दशमलव 3 डिग्री सेल्सियस ताई चढ़ ग्यो। चित्तौड़गढ़, बाड़मेर अर श्रीगंगानगर मांय ई ऊंचो ऊं ऊंचो तापमान 42 डिग्री सेल्सियस ने पार कर ग्यो। सरहदी जिला बाड़मेर मांय ई जोरदार गर्मी पड़ रही है। म्हाणा

खबरनवीस बतायो के जनता अर ढांढा-ढोरां ने गर्मी ऊं बचावण सारू प्रशासन भांत-भांत रा जतन कर रह्यो है।

000

आज विश्व पुस्तक अर कॉपीराइट दिवस है। पढ़बा री अलख जगावण अर पोथियां रो महत्त्व बतावण सारू दुनियाभर मांय ओ दिन मणायो जावे है। पुस्तक दिवस रे मौके प्रदेश मांय ई न्यारा-न्यारा कार्यक्रम राख्यी ज्या। झुन्झुनू रा सार्वजनिक जिला पुस्तकालय मांय प्रदर्शनी लगायी ज्यी। ई मौके बत्ता ऊं बत्ता बच्चां अर महिलावां ऊं किताबां ऊं जुड़बा री अपील करी ज्यी। जोबनेर रा कृषि विश्वविद्यालय मांय ई ई मौके पुस्तक प्रदर्शनी, प्रश्नोत्तरी, वाचन अर संवाद सत्र समेत केई कार्यक्रम राख्यी ज्या।

000

आई.पी.एल. क्रिकेट होड़ मांय आज हैदराबाद मांय सनराइजर्स हैदराबाद अर मुंबई इंडियंस बीचे मुकाबलो व्हेला। ओ मुकाबलो अब ऊं थोड़ी देर पछे साढ़े सात बज्यां सुरू व्हेला।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम मन की बात मांय ई दीतवार 27 अप्रैल ने विचार बतावेला। आ ई कार्यक्रम री 121वीं कड़ी व्हेला। ई सारू आप ई 25 अप्रैल तांई सुझाव भेज सको हो। आप मुफ्त नम्बर 1800-11-7800 डायल कर र राय दे सको हो। नरेंद्र मोदी एप या माय जीओवी ओपन फोरम रे जरिए ई सुझाव दिया जा सके है।

000